

DE METROP. ET COLLE. ECCLESIIIS. Fo. XIII.

Alioqui ipso facto nulla posthac alia monitione expectanda in censuras ac pœnas constitutionum canonicarum incursum.

Decani vndiquaque aduigilabunt. Cap. IX.

Quo ergo hæc quæ diximus repurgentur, ac debite simul cum omnibus alijs ad diuini officij prosecutionem ac chori disciplinam spectantibus obseruentur, Decanus diligenter inuigilabit, hinc & hinc circumspiciens, ne quid inordinate fiat.

Ante omnia vero vt Canonici sacris adsint. Cap. X.

Qui ante omnia curæ erit, ne quis Canoniorum sacris absit, sed vt qui emolumentum ferre volent, officium quoque suum, propter quod beneficium datur, in ecclesia gerant. Aurelianens. Concilio cauetur, clericos qui officio adesse contemnunt, ecclesiasticam disciplinam arbitrio Episcopi recepturos. Sed facile castigabitur hic lapsus, si negligentes subtractione proventuum seu distributionum multentur. Quare qui ab epistolæ lectione, exinde de tota missæ, & a primo psalmo, singulis horis canonicis integris ac minime interpollatis (nisi forsitan necessitate auocante, petitaq; ac obtenta licentia) non interfuerit, iustum est, vt hic illius horæ aut officij stipendio in totum careat.

Vicarij vt diuinis laudibus decantandis intersint, adigendi. Cap. XI.

Qui Vicarij dicuntur, in quibusdam collegijs se in libertatem quandam potius carnis quam spiritus vindicare contendunt, nolentes choro, decantandisq; simul cum Canonicis diuinis laudibus ac sacris esse addicti, sed hi respiscant ac incipiant intelligere cur Vicarij dicantur. Superpelliceis quoque vtantur. Cuius enim vices gerent, nisi Canonicis adiutores accedant. Horum nimirum vice, qui vel aduersa valetudine detenti, vel negotijs necessarijs auocati, interesse non possunt. Cur tandem superpelliceis vtantur, qui chori sacris se mancipatos non agnoscunt. In ordinem ergo disciplinæ redigantur, suspensionisq; pœna, etiam a fructibus, nedum quotidianis illis quæ distribuuntur, sed a grossis etiam pro culpæ modo animaduertendum in non parentes.

Ad personalem residentiam cogendi, quibus hæc per fundationes beneficiorum est imposita.

Cap. XII.

Quorum fundationes personalem residentiam requirunt, illi aut ipsi resideant, aut a proventuum perceptione suspendantur, & fructus illi, in alios pios vsus conuertantur, nisi qui reipublicæ causa ex auctoritate nostra abfuerint.

C iij Lucr